

« [p.1007] A tous ceulx que ces presentes lettres verront Jehan Champion prevost de Gonesse salut. Savoir faisons que par devant nous vint en jugement Guillaume le Truant escuier filz de feu Guillaume le Truant jadiz [p.1008] escuier lequel de sa bonne volente advoua et adveue a tenir en fief en deux homaiges de reverend pere en Dieu monseigneur l'abbé de Saint Denys une maison et mesure avecques I petit jardin enclos dedens les grans murs a tournelles seant a Tramblay avecques ung arpent de pré darriere le petit jardin tenant a ycellui jardin par dehors les murs pour ung fief et a ung homaige de rechief pour le second fief et a ung homaige ce qui sensuit. Premièrement la mairie et sergenterie de Tramblay avecques les appartenances cest assavoir troiz quartiers de terre ou environ au lieu que lendit la Mairie tenant aux murs de la court de Tramblay. De rechief le droit a lui afferant es amandes de la dite court avecques veue, arrestz, saisines, bournaiges, adiournemens a lui afferans I pain landemain de Noel et ung denier landemain de Noel pour chacun feu de la ville de Tramblay avec son droit afferant du rouaige des plastrieres de Tramblay. De rechief X sols que ledit escuier prent chacun an aux huictaines Saint Denys sur les cens de la court de Tramblay avecques quinze sextiers de grain cest assavoir six de blé et IX d'aveune que ledit escuier se dit prendre chacun an prins ledit jour en la granche de Tramblay a cause de sa dite mairie et pour le dit fief. Et se plus y avoit qui fust ou soit desdiz fiefs ou des dependences diceulx fiefz ledit escuier ladvoua et adveue a tenir dudit monseigneur l'abbé et lui proumet faire savoir si tost comme il vendroit a sa cognoissance. En temoing de ce nous avons miz en ces lettres le scele de la prevosté de Gonesse l'an de grace mil III^c L et deux le lundi avant Pasques. »